

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 448703 24 St
Tuzla, 08.08.2024. godine

Općinski sud u Tuzli, stečajni sudija Vedran Milašinović, u postupku prethodnog ispitivanja prijedloga za otvaranje stečajnog postupka nad dužnikom „LEGNAMI“ d.o.o. za drvoprerađu Doboj Istok, Klokotnica, dana 08.08.2024. godine donio je sljedeće,

RJEŠENJE

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom dužnika „LEGNAMI“ d.o.o. za drvoprerađu Doboj Istok, Klokotnica.

Za privremenog stečajnog upravnika imenuje se Emir Mehurić iz Gračanice, ul. Baranilaca kule grada b.b.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Gračanici i Službi za geodetske i imovinsko-pravne poslove Grada Gračanica, radi upisa zabilješke otvaranja prethodnog postupka.

Obrazloženje

Predlagač je podnio je ovom sudu dana 03.07.2024. godine prijedlog za otvaranje likvidacionog postupka nad dužnikom „LEGNAMI“ d.o.o. za drvoprerađu Doboj Istok, Klokotnica .

Dana 03.07.2024. godine sud je donio rješenje kojim se obustavlja postupak likvidacije, a postupak nastavlja u skladu sa odredbama Zakona o stečaju, a podneseni prijedlog se ima smatrati prijedlogom za otvaranje stečajnog postupka.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju) i da je isti dopušten, dana 03.07.2024. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač „LEGNAMI“ d.o.o. za drvoprerađu Doboj Istok, Klokotnica, je dana 07.08.2024. godine dostavio sudu dokaz o uplati predujmljenih sredstava za finansiranje prethodnog postupka u iznosu od 3.000,00 KM.

Na osnovu priložene dokumentacije i to: Prijedlog za otvaranje likvidacionog postupka od 03.07.2023. godine, izvod iz sudskog registra od 01.08.2023. godine, uvjerenje PU F BiH, Porezna ispostava Doboj Istok od 31.07.2023. godine, uvjerenje UIO BH od 03.08.2023. godine, odluka o prestanku rada društva od 03.07.2023. godine, uvjerenje PU F BiH Porezna ispostava Doboj Istok 30.06.2023. godine, Zahtjev za preknjižavanje PU KPU Tuzla ispostava Doboj Istok od 27.06.2023. godine, obavijest o računu Raiffeisen banke od 30.06.2023. godine, obavještenje o razvrstavanju poslovnog i drugog subjekta prema djelatnosti od zavoda za statistiku Sarajevo od 15.05.2001. godine, rješenje o registraciji društva od 14.05.2001. godine i uplate predujma od 3.000,00 KM, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 03.07.2024. godine, zastupnik je izjavio da društvo nema nepokretne imovine kao ni pokretne imovine. Društvo je prestalo sa radom 2001. godine kada se zastupnik sa porodicom preselio u inostranstvo i nije odjavio sebe i sina kod PU F BiH tako da su se nakupila dugovanja. Za dugovanja je saznao 2017. godine kada je htio da ide u penziju po osnovu staža koji sam ostvario u inostranstvu. Sredstava na računu društvo nema odnosno račun je ugašen 2001. godine. S obzirom na postojanje obaveza zastupnik predlaže da se predmetni postupak nastavi kao stečajni postupak i da se podneseni prijedlog smatra prijedlogom za otvaranje stečajnog postupka

U uvjerenju PU F BiH PI Doboj Istok od 30.06.2023. godine koje je dostavljeno tokom postupka je navedeno da društvo ima obaveza prema PU po osnovu doprinosa za PIO MIO, zdravstveno osiguranje i osiguranje od nezaposlenosti jer se na spisku zaposlenih od 14.05.2001. godine nalaze dva lica za koja nisu podnošeni obrasci niti su obračunavani i uplaćivani porezi i doprinosi na platu.

Iz svega navedenog proizilazi da društvo nije u mogućnosti izvršavati svoje dospjele obaveza od momenta dospijeca u neprekidnom trajanju dužem od 60 dana od dana nastanka obaveze. Konačno stanje u pogledu eventualno drugih obaveza bi se moglo utvrditi u slučaju određivanja privremenog stečajnog upravnika koji bi sudu dostavio izvještaj o poslovnom stanju kod predlagača sa izjašnjenjem o uslovima za otvaranje stečaja.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju.

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija
Vedran Milašinović

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.